

ጳውሎስ ጋላቲያ አሳሰ ፃፊዱ ከታ ጋላ ቆፋ

ዩሱስ አሼይሳ ጊዴይሳ ኦዲያ ዋንጌላ ቃላይ ዲማ ዲማ ቤሳን ሳባኬቲን፣ አይሁዳ ጊደና አሳይ አማኒ አማኒ ቢያ ዋዴ «ከሪስታኔ ጊደናው ሙሴ ሂጌ ፖላናው ኮሺዬ ኮሺኔ?» ያጊያ ኦይሸይ ኢሲፌ ዴንዲሰ። ሄ ዋዴ ጳውሎስ፣ «ከሪስታኔ ጊደናው ሙሴ ሂጌ ፖላናው ኮሺና፤ ዩሱሳን ኦራላ ዴዎ ዴማናው ኮሺያ ዋናይ አማኖ። አሳይ ያሳ ሲንላን ያላናው ዴንዳዔይ አማኖ ፃላላን» ያጊዲ ታማርሲሰ። ሺን ጉላ ኢሲያን፣ ጋላቲያ አውራጃን ዴዲያ ዋሳ ኬላን ዴዲያ አሳ ጊደን፣ «አሲ ያሳ ሲንላን ያላናው ዩሱሳ አማኖ ፃላላ ጊደናሺን ሙሴ ሂጊያካ ፖላናው ኮሺሰ» ያጊዲ ጳውሎሳ ተሚርቲያ ጳልቂያ አሳቲ ዴዎሶና።

ጳውሎስ ጋላቲያ ማፃፋ ፃፊዳይ፣ ሄ ባላ ተሚርቲያን ጨሜቲዳ አሳ ቱማ አማኑዋኮኔ አማኖ ዴዑዋኮ ዛሪናሳ። ጳውሎስ ዩሱሳ ሃዋሪ ጊዴይሳ ተላይዲ ኦዶ ኦይኪሰ። ኢያ ሃዋሪ ኦሌዲ ያጊዳይ አሴ ጊደናሺን ያሳ ጊዴይሳኔ ኢ ኪቲቲዳይ አይሁዳ ጊደና አሳሰ ጊዴይሳ ቆንጨሲዲ ኦዲሰ። ኢያራ ኦይሴሌዲ አሳይ ያላናው ዴንዳዔይ አማኖ ፃላላና ጊዴይሳ ኦዴሰ። ወርሴላ ሺምፖታን አማኖ ዴዎይ ዩሱሳ አማኖን ቤንቲያ ሲቆፔ ፑልቲይሳ ጊዴይሳ ኦዴሰ።

ጋላቲያ ከታ አይፌ ቆፋታ

- ጌሎ ቆፋ 1:1-10
- ጳውሎሳ ሃዋሪቲላ ማታ 1:11-2:21
- ያሳ አጾ ኬሃቲላ ዋንጌላ 3:1-4:31
- ላዓቲሴኔ አማኖን ዲሱ 5:1-6:10
- ኩሻ ቆፋ 6:11-18

1 አሳፔ ዋይኮ አሳ ባጋራ ጊደናሺን ዩሱሰ ኪሪስቶሳፔኔ ኢያ ሃይቆፔ ዴንሌዳ ያሳ አዋፔ ሃዋሪ ጊደና ሜላ ኪቲቲዳ ታ ጳውሎስ፣ 2 ታራ ዴዲያ አማኒያ ኢሻቲ ኡባይ፣ ጋላቲያን ዴዲያ ዋሳ ኬላታሰ ኪቲዳ ኪታ።

3 ያሳይ ኦ አዋይኔ ኦ ጎዳ ዩሱሰ ኪሪስቶሲ ሂንቲው አጾ ኬሃቲላኔ ሳርቲላ ኢሞ።

4 ሃ ኢታ ወዲያፔ ኑና አሻናው። ኑ ያሳ። ኑ አዋ ሹኔን ኪሪሰቶሲ ኑ ናጋራ ጊሾ ባና አሉ አሚሰ። 5 ያሳሰ ሜሪናፔ ሜሪና ጋካናው ቦንቶይ ጊዶ። አሚንዒ።

ቱማ ዋንጌላይ ኢሲኖ

6 ኪሪሰቶሳ አቶ ኬሃቴላን ሂንቴና ጭገዳ ያሳ አገዲ። ሃራ ዋንጌላኮ። ሂንቴ ኤሌሲዲ። ዋኒዲ ሰሚዳኮ ታና ማላሊሴሰ። 7 ሂንቴና ባሌላናውኔ ኪሪሰቶሳ ዋንጌላ ዋቢሳንው ኮያ ጉላ አሳቲ ዳዖሶናፔ አቲን ቱማ ዋንጌላይ ኢሲኖ። 8 ሺን ኑና ጊዲን ዋይኮ ሳሎ ኪታንቶ ጊዲን ኑኒ ሂንቴው ኮይሮ ኦዲዳ ዋንጌላፔ ዲማቲያ ሃራ ዋንጌላ ሂንቴው ኦዲያባ ጊዲኮ። ኢ ቃንጌቲዳባ ጊዶ። 9 ሃይሳፌ ሰንሐ ኑኒ ጊዳይሳዳ ሃዒካ ዛራዳ ጋይሰ። ሂንቴ ኤኪዳ ዋንጌላፔ ዲማቲያ ዋንጌላ ኦኒካ ሂንቴው ኦዲኮ ሄ ኡራይ ቃንጌቲዳባ ጊዶ።

10 ያቲን። ታና አሲ ናሻና ሜላ ኮያይናዬ? ዋይኮ ያሲ ናሻና ሜላ ኮያይና? ዋይኮ ታ አሴ ኡፋይሳናው ኮያይና? ታ አሴ ኡፋይሳናው ኮያባ ጊዲኮ። ኪሪሰቶሳ አይሌ ጊዲኩ።

ጳውሎሳ ጭጌቲላ

11 ታ ኢሻቶ። ታ ሂንቴው ኦዲዳ ዋንጌላይ አሳፔ ጊዶናይሳ ሂንቴ ኤራና ሜላ ታ ኮያይሰ። 12 ታው ሃ ዋንጌላ ዬሱሲ ኪሪሰቶሲ ቆንጨሲሲፔ አቲን አሳፔ ኤካቢኬ ዋይኮ አሲ ታና ታማርሲቤና።

13 ታ ካሴ አይሁዴ አማኖን ዴዒያ ዋዴ ዋና ዴዒዳኮ። ሂንቴ ሲዒዴታ። ታ ዋሳ ኬላ ቃዴይ ባይና ጎዳናውኔ ቆይሳናው ባጭታሰ።

14 አይሁዴ አማኖ ናጎን። ታ ዋዴን ዴዒያ አይሁዴ አሻታፔ አቆይሰ። ኑ አዋታ ዋጋሰካ አቆዳ ሚሹታይሰ።

15 ሺን ታ ቡሮ ታ አዬ ኡሎን ዴዒሺን ያሳይ ታና ዶሪሰ፤ ባ አቶ ኬሃቴላን ታና ጭገሰ። 16 አይሁዴ ጊዶና አሳሰ ዋንጌላ ኦዳና ሜላ ያሳይ ባ ናባ ታው ቆንጨሲዳ ዋዴ ታ ኦዴራካ ዘሪታቢኬ። 17 ዋይኮ ታፔ ሰንሐ ሃዋሬ ጊዲዳይሳታራ ጋሄታናው ዬሩሳላሜ ባቢኬ። ሺን ታ ካሴታዳ አራቤ ቢታ ባሰ፤ ሃሳፌ ሰማዳ ዳማሰቆ ካታማ ያሰ። 18 ሄቩ ላይሳፌ ጉዬ። ጳዒሮሳራ ጋሄታናው ዬሩሳላሜ ባዳ ኢያራ ታማኔ ኢቻሹ ጋላሰ ኡታሰ። 19 ሺን ጎዳ ኢሻ ያይቆባፔ አቲን ሃንኮ ሃዋሬታ ቤዓቢኬ።

1:13 ሃ.እ 8:3፤ 22:4-5፤ 26:9-11 1:14 ሃ.እ 22:3 1:15 ሃ.እ 9:3-6፤ 22:6-10፤ 26:13-18 1:18 ሃ.እ 9:26-30

20 ታ ሂንቲው ፃፊይዳይሲ ዋርዶ ገደናይሳ ያሳ ሲንላን ሂንቲው ቆንጨሳይሲ።

21 ሄሳፌ ጉዬ፣ ታኒ ሶሪያ ቢታኔ ኪልቁያ ቢታ ባሰ። 22 ዪሁዳን ዴዲያ ዋሳ ኬላ አሳይ ታና ቤዲዲ ኤሪቦኮና። 23 ሺን ኤንቲ፣ «ካሴ ኑና ጎዲያ ኡራይ፣ ሃዲ ሄ ኢ ጳይሳናው ኮያ አማኑዋባ ሳባኬሰ» ያጌይሳ ሲዲዶሶና። 24 ሲዲዳ ኡባይ ታ ጋሶን ያሳ ጋላቴዶሶና።

2

ሃዋሪቲ ጳውሎሳ ኤኪዶሶና

1 ታማኔ አይዱ ላይላፌ ጉዬ፣ ባርናባሳራ ዛራዳ ዬሩሳላሚ ባሰ። ሄ ዋዴ ቲቶ ታራ ኤካዳ ባሰ። 2 ያሳይ ታው ቆንጨሲዳ ቆንጨፍላን ያ ባዳ አይሁዴ ገደና አሳ ገደን ታ ሳባኪያ ዋንጌላ ኤንታው ቆንጨሳሰ። ካሴ ታ ዋዲዳ ዋላይኔ ሃዲካ ታ ዋዲያ ዋላይ ሃዳ ገደና ማላ ጋዳ ካሌሌይሳታ ዲማ ሺሻዳ ኤንታው ኦዳሰ። 3 ሃሪ አቶሺን፣ ታራ ዴዲያ ቲቶይ ገሪኬ ኣሲ ገዲኮካ፣ ቃፃሬቶ ገዲ ኤንግሊቦኮና። 4 ገደሺን፣ አማኒያ አሻታ ዳኒዲ ኑ ገደ ጌሊዳ ኢሶቲ ኢሶቲ ኢ ቃፃሬታና ማላ ኮዪዶሶና። ሄ አሳቲ ኪሪሰቶሰ ዬሱሳን ኑሰ ዴዲያ ላዓቴላ ዋቺዲ ቤዓናው ጌማን ኑ ገደ ጌሊዲ ዛሪዲ ኑና አይሌ ኦላናው ኮዮሶና። 5 ሺን ቱማ ዋንጌላይ ሂንቲናን ማኒዲ ዳና ማላ ኑኒ ሃሪ አቶሺን፣ ጉላ ዋዴሰካ ኤንታው ኩሼ አሚቦኮ።

6 ሺን ሃላቃ ዳኒያ አሳታ ኦናቴላይ ታው አይኮካ ገዴና። ያሳይ አሳ ሶምያ ቤዲዲ ፐርዴና። ሃ አሳቲ ታ ማርካቲያ ዋንጌላ ቦላ ጉጂዳባይ ባዋ። 7 ሺን ጳዲሮሲ፣ አይሁዴታሰ ዋንጌላ ኦዳና ማላ ያሳይ ኢያው ሃዳራ አሚዳይሳዳ ታውካ አይሁዴ ገደና አሳሰ ዋንጌላ ኦዲያ ሃዳራ አሚዳይሳ ኤንቲ ጉዬፔ ቤዲዶሶና። 8 ሂዛ፣ ጳዲሮሲ አይሁዴታ ሃዋሪ ገደና ማላ ኦሊዳ ያሳይ፣ ታካ አይሁዴ ገደና አሳሰ ሃዋሪ ገደና ማላ ኦሊሰ። 9 ቃሲ ቱሱ ዳኒዲ ቤንቲያ ያይቆቤ፣ ጳዲሮሲኔ ዮሃኒሲ፣ ታው አሜቲዳ አጾ ከሃቴላ ቤዲዳ ዋዴ ኑራ ኢሲፊዳይሳ ቆንጨሳናው ታ ኩሺያኔ ባርናባሳ ኩሺያ ኦይኪዶሶና። ኑኒ አይሁዴ ገደና አሳኮ፣ ቃሲ ኤንቲ አይሁዴ አሳኮ ባናው ገገዶሶና። 10 ኤንቲ ኑና ማንላዲ ሃዳራ ገዳይ፣ ኑኒ ማንቆታሰ ቆፓናይሳ። ካሴካ ታ ሃሳ ኦላናው አሞቴይሰ።

2:1 ሃ.አ 11:30፤ 15:2 2:6 ዛሬ 10:17

ጳውሎስ ጳዊትና ተሟርቲያ ጳጳሳዊ

11 ጳዊትና እንደዚህ ካታማ ዩዳ ዋዳ ኢ ባሊዳ ጊሾ ታኒ ኢያ ሶምዎን «ኔኒ ባላዳሳ» ጋሰ። 12 ያይቆቤ ከተዳ ጉላ አሳይ ያናፔ ሲንፍ ኢ አይሁዳ ጊደና አሳራ ሜሰ። ሺን ኤንቴ ዩዳፔ ጉዬ። «አይሁዳ ጊደና አሳፔ አማኒዳይሳቲ ቃፃሬታናው ቤሰሰ» ጊያ አሳሰ ያዩዳ ኤንታፊ ሻኬቲሰ። 13 ቃሲ ሃንኮ አማኒዳ አይሁዳቲ ጳዊትና ሃኑዋ ካሊደሶና። ሃሪ አቶሺን፣ ባርናባሲካ ኢያ ቆፋን ጎሽቲሰ።

14 ሺን ኤንቴ ዋንጌላ ቱማቲላን ሱሬ ሃሙቶናይሳ ቤዓዳ፣ ጳዊትና አሳ ኡባ ሲንላን፣ «ኔኒ አይሁዳ ጊደሹ፣ አይሁዳ ዋጋላ ጊደናሺን አይሁዳ ጊደና አሳዳ ዳዓሳ፤ ያቲን፣ ዋናዳ አይሁዳ ጊደናይሳታ፣ «አይሁዳ ዋጋን ዳዒቲ ጋዳ ዋልቃታይ?» » ያጋሰ።

15 ኔኒ ዬሌታን አይሁዳ፣ ሺን ናጋራንቾ ጊዲዳ አይሁዳ ጊደና አሳ ሜላ ጊደኮ። 16 ሺን አሲ ዬሱሰ ከሪሰቶሳ አማኒዳ ዲሊሲፔ አቲን ሂጌ ናጊዲ ዲሎናይሳ ኤሮሰ። ኦኒካ ሂጌ ናጊዲ ዲሎና ጊሾ ኑካ ሂጌ ናጊዲ ጊደናሺን ከሪሰቶሳን አማኒዳ ዲላና ሜላ ከሪሰቶሰ ዬሱሳ አማኒዳ።

17 ኑ አይሁዳቲካ ከሪሰቶሳ ባጋራ ዲላናው ኮሽሰ። ሄሳ ጊዲኮ ኑካ ሃራ አሳዳ ናጋራንቾ ጊዳይሳ ቤዖሰ። ያቲን፣ ኑ ናጋራ ኦላና ሜላ ዳንፍፍይ ከሪሰቶሳ ጉሰዬ? ኡባካ ጊደና! 18 ሂዛ፣ ታ ላሊዳይሳ ዛራዳ ከዲያባ ጊዲኮ ታኒ ታ ሁዔን ሂጌ ሜንፍይሳ ጊዳይሳ ቆንጨሳይሰ። 19 ታኒ ያሳሰ ዳና ሜላ ሂጌ ባጋራ ሂጌሰ ሃይቃሰ። 20 ታኒ ከሪሰቶሳ ማሰቃሊያ ቦላ ካቁታሰ። ታኒ ሂዛፔ ታው ዳዒኬ፣ ሺን ከሪሰቶሲ ታናን ዳዔሰ። ታ ሃዒ ዳዒያ ዳዑዋ፣ ታና ደሲዲ ታ ጊሾ ባና አሊ አሚዳ ያሳ ናዓ አማናዳ ዳዓይሰ። 21 ታኒ ያሳ አጼ ከሃቲላ ሃዳ ኦሊኬ። ዲሎቲሊ አሳሰ ሂጌ ባጋራ ቤንቲያባ ጊዲያኮ፣ ከሪሰቶሲ ጮ ሃይቁሰ ጉሰ።

3

ዲሎቲሊ አማናና

1 ሂንቲና፣ አክኪ ባይና ጋላቲያ አሳው፣ ሂንቲ አይፊያ ሲንላን ከሪሰቶሲ ማሰቃሊ ቦላ ካቁቲዳ ሚሲሌዳ ቆንጨዲ ቤንቲሰ። ያቲን፣ ቱማሰ ሂንቲ ከቲቶና ሜላ ሂንቲና ቢቲዳይ ኦኔ? 2 ታ ኢሲባ ኤራናው ኮያይሰ፤ ሂንቲ ጌሻ አናና ኤኪዳይ ሂጌ ናጊዲዬ ዋይኮ ሂንቲ ሲዒዳ ዋንጌላ አማኒዳ ኤኪዳይ? 3 ሂንቲ ሄሳ

2:16 ማዘ 143:2፤ ሮሜ 3:20፣ 22

ሜላ ኤዬ? ሂንቲ ያሳ አያናን ደሚዲ፣ ሃዒ ዋልቃን ፖላናው ኮዬቲ? 4 ሂንቲ ዋንጌላ ጋሶን ዳሮ ዋዬቲዳይ ሜሌ? ሄ ዋዬ ኡባይ ጮ ጊዲዳ? 5 ያሳይ ሂንቲው ጌሻ አያና ኢሜይኔ ሂንቲ ጊደን ማላታታ ኦፊይ፣ ሂንቲ ሂጌ ናጊዳ ጊሾዬ ዋይኮ ዋንጌላ ሲዒዲ አማኒዳ ጊሾ?

6 እኔ አብራሃሜ ቤዒቲ፣ «ኢ ያሳ አማኒስ፤ ያሳይ ኢያው ሄሳ ዒሎቴሊ ኦሊዲ ኤኪስ» ጌቲቲዲ ፃፊቲስ። 7 ሂዛ፣ አማኔይሳቲ አብራሃሜ ናይታ ጊዳይሳ ኤሪቲ። 8 ያሳይ አይሁዳ ጊደና አሳ አማኖን ዒሊሳናይሳ ጌሻ ማፃፋይ ቤዒዲ፣ «ካዋቲላ ኡባይ ኔናን እንጃታና» ያጊዲ፣ ዋንጌላ አብራሃሜስ ካሴቲዲ ኦዲስ። 9 ሄሳ ጊሾ፣ አማኒያ ኡባይ አማኒዳ አብራሃሜራ ኢሲፊ እንጃቲደሶና።

10 ሂጌ ናጊዲ ዒላና ጊያ ኦኒካ ቃንጌቲዳይሳ። አይስ ጊኮ፣ ጌሻ ማፃፋን፣ «ሂጌ ማፃፋን ፃፊቲዳ ኡባ ናጎና ኦኒካ ቃንጌቲዳይሳ ጊደ» ጌቲቲዲ ፃፊቲስ። 11 «ዒሎይ አማኖን ዳና» ጌቲቲዲ ፃፊቲዳ ጊሾ ኦኒካ ያሳ ሲንላን ሂጌ ናጊዲ ዒሎናይሲ ኤሬቲዳባ።

12 ሂጌይ አማኖን ዜምፔና። ሺን፣ «ሂጊያ ናጊያ ኦኒካ ሂጊያን ዴዎን ዳና» ያጌስ።

13 «ሚላ ቦላ ካቁቲዲ ሃይቁያ ኦኒካ ቃንጌቲዳይሳ» ጌቲቲ ፃፊቲዳ ጊሾ ኪሪሰቶሲ ኑ ጊሾ ቃንጌቲዳይሳ ጊዲዲ፣ ኑና ሂጌ ቃንጌላፊ ዋዚስ። 14 ያሳይ አብራሃሜስ ኢሚዳ እንጃይ፣ ዬሱስ ኪሪሰቶሳ ባጋራ አይሁዳ ጊደና አሳ ጋካና ሜላኔ ያሳይ ኢማና ጊዳ ጌሻ አያና ኦኒ አማኖን ኤካና ሜላ ሄሳ ኦሊስ።

ሂጌኔ ኡፋይሳ ቃላ

15 ታ አሻቶ፣ ታ ሂንቲው አሳ ዴዎን ሜዜ ጊዲዲ ዴዒያባ ለሚሶ ኦላዳ ኦዳይስ። አሲ ጫቁዳ ጫቆይ ሚኒዳፔ ጉዬ፣ ኦኒካ ሄ ጫቁዋ ሻራናው ዋይኮ ኢያ ቦላ ሃራ ጉጃናው ዳንዳዔና። 16 ያሳይ ሄ ኬኬ ቃላ አብራሃሜሲኔ ኢያ ዜሬላሰ ኢሚስ። ጌሻ ማፃፋይ፣ ዳሮ አሳሰ ኦዲያዳ፣ «ኔ ዜሬላታስ» ጌና። ሺን ኢሲ አሳሰ ኦዲያዳ፣ «ኔ ዜሬላሰ» ያጌስ፤ ኢካ ኪሪሰቶሳ።

17 ታኒ ጌይ ሃይሳ፤ ኦይዲ ዪታኔ ሃሰታሙ ላይላፊ ጉዬ ኢሚቲዳ ሂጌይ፣ ኮይሮ ያሳይ ሚንሲዳ ጫቁዋ ሻራዲ ኡፋይሳ ቃላ ዳይሳናው ዳንዳዔና። 18 ያሳይ ኢሚያ ላታይ ሂጌን ኤኬቲያባ

3:6 ሜዴ 15:6፤ ሮሜ 4:3 3:7 ሮሜ 4:16 3:8 ሜዴ 12:3 3:10
ዛሬ 27:26 3:11 ኢብ 2:4 3:12 ለዌ 18:5 3:13 ዛሬ 21:23
3:16 ሜዴ 12:7 3:17 ኬሳ 12:40

ጊዲያኮ ያሳይ አሚዳ ኡፋይሳ ባጋራ ጊዴይሲ አቴሰ። ሺን ያሳይ ባ አጾ ከሃቴላን ላታ ኣብራሃሚሰ ኡፋይሳ ቃላ ባጋራ አሚሰ።

19 ያተን፣ ሂጌይ ኣይሰ አሚተዳ? ሂጌይ አሚተዳይ፣ ኣብራሃሚሰ ኡፋይሳ ቃሊ አሚተዳ ዜሬላይ ያና ጋካናው ኢታ ኦሶይ ኣይቤኮ ኤሪሳናሳ። ሂጌይ ከታንቸታ ባጋራ አሚተዳ፣ ጊዶ ጊዲዲ ሲጌሌያ ኢሲ ኣሳ ባጋራ ኦሶ ቦላ ፔዒሰ። 20 ጊዶ ጊዲዲ ሲጌሌያ ኡራይ ኢሲ ኣሳ ፃላላሰ ጊዴና፣ ሺን ያሳይ ኢሲኖ።

21 ያተን፣ ሂጌይ ያሳ ኡፋይሳ ቃላራ ኤቁተዬ? ኣካይ፣ ጊዴና! ሂጌይ አሚተዳይ ኣሳሰ ዴዎ አሚናው ጊዲያኮ፣ ጂሎቴሌ ሂጌ ባጋራ ቤንታናሺን። 22 ሺን ዬሱሰ ከሪሰቶሳ ኣሚኒን ቤንቲያ ኡፋይሳ ቃላይ ኣማኔይሳታሰ አሚታና ሚላ ኩሚሳ ኣላሚይ ናጋራሰ ሃሬተዲ ዴዔይሳ ጌሻ ማፃፋይ ኦዴሰ።

23 ሺን አማኖይ ያናፔ ካሴ ሂጌይ ኦና ቃቺ ዎሊሰ። ሄ አማኖይ ቆንጫና ጋካናው ሂጌይ ኦ ቦላ ጎርዲ ዎሊሰ። 24 ሄሳ ጊሾ፣ ኦኒ ኣማኖን ጂላና ሚላ ከሪሰቶሰ ያና ጋካናው ሂጌይ ናባ ናጊያ ኣሳ ሚላ ኦና ናጌይሳ ጊዲሰ። 25 ሺን ሃዒ አማኖይ ዪዳ ጊሾ ሂጌይ ሂዛፔ ጉዬ ናባ ናጊያ ኣሳ ሚላ ኦና ናጌይሲ ኣቴሰ።

26 ሂንቲ ኡባይ ዬሱሰ ከሪሰቶሳ ኣሚኒዲ ያሳ ናይታ ጊዲዴታ። 27 ከሪሰቶሳራ ኢሲኖ ጊዳናው ፃማቁተዳ ኡባይ ከሪሰቶሳ ማዎዳ ማዒዳታ። 28 ሂንቲ ኡባይ ከሪሰቶሳን ኢሲኖ ጊዲያ ጊሾ ኣይሁዴ ኣሳ ጊዶኒኔ ጊሪኬ ኣሳ ጊዶን፣ ኣይሌ ጊዶኒኔ ዎማኖ ጊዶን፣ ኣዴ ጊዶኒኔ ማጫሳ ጊዶን ዲማቴሌ ባዎ። 29 ሂዛ፣ ሂንቲ ከሪሰቶሳባ ጊዲኮ ሂንቲ ኣብራሃሚ ዛሬ። ያሳ ኡፋይሳ ቃላዳ ሂንቲ ላቴይሳታ።

4

1 ታ ጌይሲ ሃይሳ። ላቴይ ናባ ጊዲ ዴዒሼ፣ ሻሎ ኡባይ ኢያባ ጊዲኮካ፣ ኢ ኣይሌፌ ኣይኮካ ዲማቴና። 2 ሺን ኢያ ኣዎይ ጊዳ ዎዴይ ጋካናው ኢ ሃዳራ ኤኪዳይሳታ ኩሼኒኔ ናጌይሳታ ኩሼን ዴዔሰ። 3 ሄሳዳካ፣ ኦኒ ናባቴላን ዴዒያ ዎዴ ኣላሚያ ዎጋሰ ኣይሌተዲ ዴዒዳ። 4 ሺን ዎዴይ ጋኪዳ ዎዴ ያሳይ ሂጌፌ ጋርሳን፣ ማጫሳፔ ዬሌተዳ ባ ናባ ከተሰ። 5 ኢ ሄሳ ኣሌዳይ፣ ሂጌሰ ሃሬተዲ ዴዔይሳታ ዎዛናውኔ ኦና ባ ናይታ ኦላናሳ።

6 ኑ ያሳ ናይታ ጊዲያ ጊሾ «አባ፡ አዋው» ጊዲ ዪጊያ ባ ናዓ አያና ኑ ዋዛና ጊደ ከተሰ። 7 ሄሳ ጊሾ፡ ሂዛፔ ኔኒ ያሳ ናዓፔ አቲን አይሌ ጊዳካ። ኔኒ ኢያ ናዓ ጊዲኮ፡ ያሳ ላቴይሳ ጊዳዳሳ።

ጳውሎሲ ጋላቲያ አሳስ ቆፒስ

8 ሂንቴ ካሴ ያሳ ኤሮና ዋዴ ያሴ ጊደናይሳታስ አይሌ ጊዲዲ ሃሬተዴታ። 9 ሺን ሃዒ ሂንቴ ያሳ ኤሪዴታ፤ ኡባራካ ያሳን ኤሬተዴታ። ያቲን ፓሉና ኅዖና አላሜ ዋጋታኮ ጉዬ ዋኒዲ ሰሚቴ? ዋጲ ኤቁዲ፡ ዋኒዲ ኤንታው አይሌ ጊደናው ኮዬት? 10 ዲማ ጊዲዳ ጋላሳታ፡ አጌናታ፡ ዋዴታኔ ላይላታ ሂንቴ ሎይሳ ለንቹታ። 11 ታና ሂንቴባይ ያሽሰ፤ ታ ሂንቴው ጮ ዳቡራዲናሻ?

12 ታ አሻቶ፡ ታ ሂንቴዳ ሃኒዳ ጊሾ ሂንቴካ ታዳ ሃኒቴ ጋዳ ሂንቴና ዋሳይሰ። ሂንቴ ታና አይቢንካ ቆሃቤኬታ። 13 ታኒ ኮይሮ ሃርጌታሽ ሂንቴው ዋንጌላ ኦዲዳይሳ ሂንቴ ኤሬታ። 14 ታ ሃርጌይ ሂንቴው ፓጩ ጊዲኮካ፡ ታና ሳሌቲቤኬታ፤ ኢደቤኬታ። ሺን ታና ያሳ ከታንቾ ዋይኮ ከሪሰቶስ ዬሱሳ ዋኬይሳዳ ዋኪዴታ።

15 ያቲን፡ ሂ ሂንቴው ዴዒያ ኡፋይሳይ ኡባይ አው ቢዴ? ሂንቴው ዳንዳዒቲዳኮ፡ ሂንቴ ታው፡ ሂንቴ አይፊያ ኬሲዲ አሚያኮ ኢዖናይሳ ታ ማርካታይሰ። 16 ያቲን፡ ታ ሂንቴው ቱማ ኦዲዳ ጊሾ ሂንቴው ዋርኬ ጊዳዲናዬ?

17 ሄ አሳቲ ሂንቴና ባንታኮ ዛራናው ኮዮሶና፡ ሺን ኤንታ ቆፋይ ሎዖሳ ጊዴና። ኤንታ ቆፋይ ሂንቴና ሻካናሳኔ ሂንቴ ኤንታው ቆፓና ማላ ኦላናሳ። 18 ሎዖባ ኦላናው አዋቲኮ ሎዖ፡ ሺን ሄሲ ታ ሂንቴራ ዴዒያ ዋዴ ዓላላ ጊደናሺን ኡባ ዋዴ ጊድ።

19 ታ ሲቆ ናይቶ፡ ከሪሰቶሲ ሂንቴናን ሚሲሌታና ጋካናው ዬሎስ ማጫሲ ሚዖቴይሳዳ ታ ሂንቴ ጊሾ ሚዖታይሰ። 20 ሂንቴባይ ታው ሃዲርሲ ጊዲን ታ ኡንዔታስ፤ ሃዒ ሂንቴ ጊደን ታ ቤንታዳ ሽኔታዳ ኦዲያኮ አይ ማላ ደሳይናሺን።

አጋርኔ ሳር

21 ሙሴ ሂንጌን ሃሬተዲ ዳናው ኮዬይሳቶ፡ አኔ ታው ኦዲቴ፤ ሂጌይ አይ ጊያኮ ኤሬኬቲ? 22 ጌሻ ማፃፋይ፡ «አብራሃሜስ አይሌፊኔ ኅዳቲፊ ዬሌቲዳ ናምዑ ናይቲ ዴዖሶና» ያጌሰ።

23 አይሌ ናዓይ አሲ ናዓ ዬሊያ ማራን ዬሌቲስ፡ ሺን ኅዳቲ ናዓይ ያሳ ኡፋይሳ ቃላን ዬሌቲስ።

24 ሃ ማጫሳቲ ናምዑ ጫቆታስ ለሚሶ ጊዲዲ ኤኬቶሶና። ኤንታፌ ኢሲኒያ፣ ሲና ደሪያፔ ዩዳራ፣ ባ ናይታ ኣይሌቴላስ ዩላሱ፤ ኢያካ ኣጋር። 25 ኣጋራ ኣራቤ ቢታን ደዒያ ሲና ደሪያን ለሚሶታዳ ሃዒ ደዒያ ዩራሳላሜ ዳናዉሱ። ኣይስ ጊኮ፣ ኢያ ባ ናይታራ ኣይሌቴላን ደዓዉሱ። 26 ሺን ሳሎን ደዒያ ዩራሳላሜይ ኣይሌቴላን ደዑኩ፤ ኢያ ኑ ኡባስ ኣዮ። 27 ጌሻ ማፃፋይ፡ «ናቴ፣ ዩሎና ማይንሕቴ ኡፋይታ፤ ናቴ ሚያታ ኤርናሬ ኢሊላ።

ኣዚናራ ደዒያ ማጫሶቴ፣ ኣዚኒ ባይና ማጫሶስ ናይቲ ዳር» ያጌሱ።

28 ታ ኣሻቶ፣ ሂንቴ ዩሳቃዳ ያሳ ኡፋይሳ ቃላን ዩሌቴዳ ናይታ። 29 ሺን ሄ ዎዴ ኣሳ ማራዳ ዩሌቴዳይሲ፣ ኣያና ዎላቃን ዩሌቴዳይሳ ጎዲሱ። ሃቸካ ሄሳ ማላ። 30 ሺን ጌሻ ማፃፋይ ዎይጊ? «ኣይሌ ናዓይ ጎዳቴ ናዓራ ኢሲፌ ላቶና ጊሾ ኣይለው ኢ ናዓራ ዎላ ኬሳ ዩዳ» ያጌሱ። 31 ሄሳ ጊሾ፣ ታ ኣሻቶ፣ ኑኒ ጎዳቴ ናይታፔ ኣቲን ኣይሌ ናይታ ጊዶኮ።

5

ኪሪሰቶስን ደዒያ ላዓቴላ

1 ኑኒ ላዓቴላን ዳና ማላ ኪሪሰቶሲ ኑና ኣይሌቴላፌ ኬሲሱ። ሂዛ፣ ሚኒዲ ኤቂቴ፤ ዛሪዲ ኣይሌቴላ ቃምባሪን ጌሎፒቴ።

2 ታ፣ ጳውሎሲ፣ ጌይሳ ሲዒቴ። ሂንቴ ቃፃሬታናው ኮይኮ፣ ኪሪሰቶሲ ሂንቴና ኣይኮካ ማዴና። 3 ቃፃሬቲያ ኦኒካ ሂጌይ ከቲያ ኡባ ፖላናው ቤሴይሳ ጉጃዳ ታ ኦዳይሱ። 4 ሂጌ ናጊዲ ዲላናው ኮዩይሳቶ፣ ኪሪሰቶሳፔ ሻኬቲዳታ፤ ያሳ ኣጼ ከሃቴላፌ ኩንዲዳታ። 5 ሺን ኑኒ ያሳ ኣያና ባጋራ ኣማኖን ዲላናው ኡፋይሳን ናጎሱ። 6 ሂዛ፣ ኪሪሰቶስ ዩሱሳን ደዒኮ፣ ሲቆን ቆንጨያ ኣማኖፔ ኣቲን ቃፃሬቲን፣ ቃፃሬቶና ኣጊን ኑና ኣይኮካ ማዴና።

7 ካሴ ሂንቴ ሎዎ ዎዳታ፣ ሺን ሃዒ ቲማስ ከቲቶና ማላ ሂንቴና ዲጊዳይ ኦኒ? 8 ሃይሳ ማላ ኢታ ጨሞይ ሂንቴና ዪጊዳ ያሳፌ ዩቤና። 9 ሄሲካ፣ «ጉላ ኢርሾይ ሙኑቃ ኡባ ዴንሕሱ።» ጌቴቲዲ ያፌቲዳይሳ ማላ። 10 ሂንቴው ሃራ ቆፊ ባይናይሳስ ታ ጎዳን ኣማኔታይሱ። ሺን ሂንቴና ቡቂያ ኦኒካ ያሳፌ ባ ፒርዳ ኤካና።

4:27 ኢሳ 54:1 4:29 ሜዴ 21:9 4:30 ሜዴ 21:10 5:9 1ቆር 5:6

11 ታ ኢሻቶ፣ ታ ሃዒ ጋካናው ቃፃሮ ሳባኪያባ ገዲኮ፣ ያቲን ታና ኣይሰ ጎደና? ሄሲ ቱማ ገዲያኮ ኪሪሰቶሳ ማሰቃሊያባ ታማርሶይ ኣሳሰ ጴቤ ገደናሺን። 12 ሂንቴና ቡቁይሳቲ ቃፃሬቴላ ፃላላ ገደናሺን ባንታና ቃራቲያኮካ ታ ደሳይሰ።

13 ታ ኢሻቶ፣ ሂንቴ ላዒ ዳናው ፃጌቲዳታ። ገደሺን፣ ሂንቴ ላዒቴላይ ኣሾ ኣሞ ፖላናው ሂንቴው ጋሶ ገደፖ፤ ሄሳፌ ኣሊዲ ኢሶይ ኢሱዋ ሲቆን ማዲቲ። 14 ሂጌ ኡባይ፣ «ኣሴ ኔዳ ደሳ» ያገያ ኢሲ ቃላን ቃሾቲሰ። 15 ሺን ሂንቴ ኢሶይ ኢሱዋራ ሳፃቲያባኔ ማቴቲያባ ገዲኮ፣ ሂንቴ ዋሊ ዉርሶና ማላ ናጌቲቲ።

ኣያና ዴዖኔ ኣሾ ዴዖ

16 ሂዛ፣ ታ ሂንቴው ኦዲይሰ፤ ኣያናን ዴዒቲ፤ ሂንቴ ኣሾ ኣሙዋ ፖሎፒቲ። 17 ኣሾ ኣሞይ ኣያና ኣሙዋራ ሞርኬ፤ ቃሲ ኣያና ኣሞይካ ኣሾ ኣሙዋራ ሞርኬ። ኤንቲ ኢሶይ ኢሱዋራ ኢፃቲያ ገሾ ሂንቴ ደሲያባ ኦላናው ዳንዳዔኬታ። 18 ሺን ኣያናይ ሂንቴና ካሌሊያባ ገዲኮ ሂጌይ ሂንቴና ሃራና።

19 ኣሾ ኦሶቲ ኤሬቲዳይሳታ፤ ኤንቲካ፣ ላይማቴላ፣ ቲናቴላ፣ ቃይፃ፣ 20 ኤቃ ጎይና፣ ቢታ፣ ሞርኬቴላ፣ ካቺ፣ ቃናቴ፣ ሃንቆ፣ ባና ደሶ፣ ሻኬቴላ፣ ኢታ ቶቤ 21 ጌኔ፣ ማላ፣ ዩሌኔ ሄሳ ሄሳ ማላታ። ካሴ ታ ሂንቴው ኦዲዳይሳዳ ሃዒካ ታ ሂንቴው ኦዲይሰ። ሃይሳ ማላባታ ኦሌይሳቲ ያሳ ካዎቴላ ላቶኮና።

22 ሺን ኣያና ኣይፊይ፣ ሲቆ፣ ኡፋይሲ፣ ሳሮቴላ፣ ዳንዳዒ፣ ኬሃቴላ፣ ሎዖቴላ፣ ኣማና፣ 23 ኣሽኬቴላ፣ ባና ሃሮ። ሃይሳ ማላባታ ኢፂያ ሂጌይ ባዋ።

24 ኪሪሰቶሰ ዩሱሳባ ገዲዳይሳቲ ባንታ ኣሹዋ ኢያ ኢታ ቆፋራኔ ኢያ ኣሙዋራ ኢሲፌ ማሰቃሊያ ቦላ ካቂደሶና። 25 ኦ ኣያናን ዴዒያባ ገዲኮ፣ ኦና ኣያናይ ካሌላ። 26 ኣኔ ኢሶይ ኢሱዋ ዪሎዪሼኔ ቃናቲሼ ጮ ጨቁቴይሳ ኣጎሰ።

6

ኢሶይ ኢሱዋ ማዲቲ

1 ታ ኢሻቶ፣ ኢሲ ኣሲ ናጋራን ኩንዲኮ፣ ኣያናን ዴዒያ ሂንቴ ሄ ኡራ ኣሽኬቴላን ሱሪሰቲ። ሺን ኔኒ ሄሳ ማላባን ፓጨቶና ማላ ኔና ናጋ። 2 ኢሶይ ኢሱዋ ዴዖ ቶሁዋ ቶኪቲ። ያቲኮ ኪሪሰቶሳ ሂገያ ፖሌታ። 3 ኢሲ ኣሲ ኣይኮይካ ባዋሺን፣ ባና ሃራታቴ ሎዖ

5:14 ሉዌ 19:18 5:17 ሮሜ 7:15-23

ጊዲ ቆጥኮ፣ ኢ ባና ጨመሰ። 4 ሺን ኢሲ ኢሲ ኣሲ ባ ኦሱዋ ፓጮ። ሄሳፌ ጉዬ፣ ሃራታራ ባና ጋዴዬይሳ ኣጊዲ ባው ጨቁቲያባ ዴመሰ። 5 ኢሲ ኢሲ ኣሲ ባ ቶሁዋ ባው ቶካናው ቤሴሰ።

6 ያሳ ቃላ ታማሪያ ኦኒካ ሎዖባ ኡባ ባ ኣሰታማሪያራ ሻኬቲሰ።

7 ሂንቴ፣ ሂንቴና ጨዋፊቴ። ኣሲ ባ ዜሪዳባ ዛሪዲ ጫኪያ ጊሾ ያሳ ቦላ ቁልቁሶፒቴ። 8 ባ ኣሾ ኣሙዋ ኩንላናው ዜሪያ ኦኒካ፣ ባ ኣሾ ኣሙዋፔ ሃይቆ ቡጫና። ሺን ኣያና ኡፋይሳናው ዜሪያ ኦኒካ ኣያናፔ ሜሪና ዴዖ ጫካና። 9 ኣኔ ሎዖ ኦሶ ኦላናው ኣዛሌይሳ ኣጎሰ። ኦኒ ኣዛሎና ኢደኮ ዋዴይ ጋኪያ ዋዴ ኦ ዜሪዳይሳ ጫካና። 10 ኦ ኢንጃ ዋዴ ዴሚኮ፣ ኣሳ ኡባሰ፣ ኣሊዲካ ኣማኒያ ኣሳሰ ሎዖባ ኦሶሰ።

ዉርሴላ ዞሬኔ ሳሮታ

11 ታኒ ታ ኩሼን፣ ኣይ ሜላ ጊታ ፒዳሌን ሂንቴው ፃፊዳኮ ቤዒቴ። 12 ኣሳ ሰንላን ሎዖ ጊዲዲ ቤንታናው ኮያ ኣሳቲ ሂንቴ ቃፃሬታና ሜላ ኮዮሶና። ሺን ሄሳ ኤንቲ ኦሌይ፣ ኪሪሰቶሳ ማሰቃሊያ ጊሾ ኤንታና ጎዲ ጋኮና ሜላሳ። 13 ኤንቲ ሂንቴ ቃፃሬቲላን ጨቁታናው ኮዩዲ ሂንቴና ቃፃሬቶ ጎሶናፔ ኣቲን ቃፃሬቲዳይሳቲካ ባንታ ሁዒን ሂጊያ ናጎኮና።

14 ሺን ኣላሚይ ታው ካቁቲዳይሳፌኔ ታኒካ ኣላሚያሰ ካቁቲዳ፣ ጎዳ ዩሱሰ ኪሪሰቶሳ ማሰቃሊያፔ ኣቲን ሃራ ጨቁቲላ ታፔ ሃኮ። 15 ሂዛ፣ ቃፃሬቲን ቃፃሬቶና ኣጊን ኣይኮካ ማዴና። ማዴይ ኦራላ ሜዴቴላ ጊደ። 16 ሃ ዋጋ ካሊያ ኡባሲኔ ያሳ ዴሬ ጊዲዳ ኢሰራዔሌሰ ሳሮቲላይኔ ማሮቲላይ ጊደ።

17 ታኒ ዩሱሳሰ ማዲንዲዳ ቤታ ታ ኣሳቲላን ቶኪዳ ጊሾ ሂዛፔ ታና ኦኒካ ዋይሶፖ።

18 ታ ኢሻቶ፣ ኦ ጎዳ ዩሱሰ ኪሪሰቶሳ ኣጶ ኬሃቴላይ ሂንቴራ ጊደ። ኣሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022

c35d6c73-3843-5482-b53e-7559d35deee5